

廣靈縣誌卷之三

山川誌

宋夾漈鄭氏曰州縣之設有時而更山川之形千古不易故禹貢分州必以山川定疆界廣靈四面皆山自太行發脉由鴈門入應州至渾源之亂嶺關右旋由白羊南山趨蔚州左折由大山抵宣府界水則發源莎泉合壺山神泉南繞縣城東經蔚州北注襄山東麓至宣府順聖東城合于桑乾此山川之大畧也爰誌山川而以景物橋樑附焉

一諸山

廣靈縣誌

卷三

山川

飛鳳山在縣東二十里

府志作縣東北二十五里

一岡突兀軒然

翔起

下有洗馬庄卽元侍郎龐清故里清曾爲洗馬故名今訛洗爲西

瓦房山在縣東北四十里形如瓦房故名

老山在縣東北三里其山皆石

見府志

華山在縣東北四十里其山產樺上有三分岩

見府志

巧八山在縣北二十里

府志作三十里

其山居中四圍七山

相向東南十里有滴水崖泉脉自穴中出滴水成池大山在縣北三十里礪道直躋峻而不險至嶺巔頗廣漫復聳一山名平原塙高插雲表北瞰陽和塞南望太白峯宛在指顧間道通天鎮陽和折西夾石溝



爲縣北界從此趨下磴道盤旋馬不並馳設伏以守  
寇不能度亦縣北屏障也臥龍岡在縣北八里山脈  
蜿蜒自西而來凝結東向與龍伏岩對峙左右宛然  
二龍蟠戲

平頂山在縣北三十里

見府志

牛欄塌山在縣北三十里其山週圍有石欄

見府志

千夫山一名千福山在縣西北五里相傳前代遣千  
人取花斑石于此上有北嶽行宮每年三月十七日  
縣民祈福于此故又名千福山

九層山在縣西北二十五里上有九層崖

見府志

廣靈縣誌

卷三

山川

二

六稜山在縣西北七十里其山前後各垂三稜

火燒嶺在縣西北六十里

府志作五十里

石梯嶺在縣西二十里渾源要路自麓至嶺石磴陡  
絕似梯明道人高仲寶損高增卑遂爲周道無復登  
梯之難

白羊山在縣西五十里昔有人見白羊往來山上故  
名上有白羊寺遺址

望狐山在縣西六十里

府志作五十里

世傳有神人引狐入

山故名

鞍子山在縣西三里二阜相連宛若鞍形

見府志



黃龍山在縣西三十里昔有黃龍見故名上有黃龍神祠

馬蹄嶺在縣西五十里石上有馬蹄跡

廻嶺山在縣西五十里渾源孔道

社臺山在縣西關內石岡如臺上有龍母神祠土人六月饗賽于此

斷駕嶺在縣西四十里

天井山在縣西南二十里上有天井寺故址寺有井深五六尺雖旱不竭

臨灌山在縣西南四十里上有石夾流泉以資數里

廣靈縣誌

卷三 山川

三

灌漑 見府志

遇逢山 府志作玉峯山 在縣南一里相傳有神仙採藥於此人遇之忽不見今石上有足跡存焉

直峪山在縣南十五里卽直峪口靈卽要路下有河注壺流

留老山在城南十五里 府志作二十里 昔袁吉棄父於此其子袁表諫而載歸下卽袁表故里

加斗山又名神峰山在縣東南二十里有圮城形蹟猶存峯巒峭立迥出雲霄有如斗星布列內有石孔似門孤峯挺立其秀麗之狀非他比也下有加斗村



卽元總管聶諒故里

壺山在縣東南里許平地一山兀峙上有大士菴內有石井其水從座下獅口內溢以菓物投之卽由山脚流出環山皆泉如萬斛珠璣隨地而湧匯爲一池週廣數畝與壺河水合夏秋碧光灩澦春冬霧氣空濛遊人登眺頗裕奇觀舊有豐水神祠飛碓懸樓水渠稻壟今俱廢

一諸水

壺流河古名滋水源出縣西三十里莎泉東注壺山下神泉二水合流上狹下闊其形如壺故名經蔚州

廣靈縣誌

卷三 山川

四

至順聖川入桑乾

莎泉在縣西三十里泉約畝許沸騰汹涌淙淙有聲卽壺河發源

一斗泉在縣西北二十里昔鄉人掘井三十餘丈竟不及泉忽水自西山崖畔突出池僅斗許足供百家故名

滴水崖泉在縣北十五里山腰懸崖數丈可容千人水自石隙中流注於潭潭週圍丈餘深僅尺許味殊甘美大旱不竭淋雨不溢遇旱禱雨輒應

作曠海波池在縣西十里西山麓有泉數泓匯爲一



池僅二畝汪洋數里每逢雷雨則水湧漲東流入壺河

灑雨泉在縣南十五里直峪口內源自沙隙突出遇旱使數婦人灑之即雨北入壺河

鴉兒滙在縣西南四里鴉多飲啄於此暑月有冰人感寒疾取而飲之汗出即愈諺云壽民丹水

集興疇水在縣南五里府志作十里其水清湛冬夏不竭

注壺河

枕頭河在縣南三里源出翟家疇形類角枕故名東

注壺河

石井詳見壺山

神泉詳見壺山即豐水

常江峪水源出南汗至常江從崖而下入潭萬丈深不可尋底大雨始入壺河

一景物



豐水夜月

廩生韓士奇寫




縣治南數拾武有壺流河一名豐水灘高水白石靜  
 沙明兩岸滌澗一望無際若月夕臨之水天一色月  
 流波底寒映碧空碎影玲瓏清光蕩漾宛若雪夜入  
 山陰道中令人依依不忍去也



社臺朝雨


廩生韓士奇寫



城西關有社臺山臺高敞可遠眺時見山色空濛川  
 光瀲灩上有龍母祠邑人禱雨於此邑侯李公遂  
 命重修之頗亦輝煌若清晨雨景登臺望之致足怡  
 情焉



千福曉鐘



廩生韓士奇寫

千福山距城北五里許頂建北嶽神祠流丹浥翠  
 徑曲花幽舍宇出重霄間左右諸峯羅列環繞縣城  
 每清晨經課不絕梵貝依稀居民聞鐘聲自白雲來  
 廬舍開曉爨烟相望亦多佳致也





斗山積雪


廩生韓士奇寫



斗山當邑中戶牖城裡外皆共見焉山頂多積雪不  
 獨冬春爲然也夏亦間有晴天曉望但見積素凝花  
 霏霏微微嶙嶙峋峋若斷若連若遠若近若玉龍蟠  
 澗若銀河墜影若白鴉之棲遠樹若瓊臺之現碧空  
 儀形因之一靜心胸爲之一快也



壺泉春柳



廩生韓士奇寫

城東最近平原曠衍突出一峯峯頂有九江聖母祠  
 祠後 大士閣下獅子口噴泉一泓味甚甘美東澹  
 爲小池若半規新月池側舊築精舍環以林木爲居  
 人登眺遊息之所後廢邑侯李公以是地爲縣治水  
 口去路宜聳不宜陷購植柳樹百株疎密交加周圍  
 掩映當春夏間淡黃拂水嫩綠含烟悠然自遠



飛鳳晴嵐



廩生韓士奇寫

飛鳳山爲邑東北屏障一峯逶迤向南側出紆折二十餘里回環側抱遠衛縣城望之如鳳翹然忽青忽靄忽丹忽赤冬夏各殊朝夕互異若雨後初晴蒼烟迷樹雲氣摩空亦異觀哉



聖泉松風

廩生韓士奇寫



聖泉寺在南山之西有石泉焉寒流當澗飛瀑懸崖  
厥寺最古兩崖蒼松屈曲交加盤盤菌菌陰翳蔽天  
風濤號谷坐其下者每疑有寶花墜空笙簧隔水也



白羊暮靄

廩生韓士奇寫



縣西四十里層巒而高聳者為白山亭雲閣霧窈  
 誕離奇四時變態不一最可愛者夕陽在山朱霞映  
 日炯炯煌煌光怪怪無所不有遠山觀之猶為奇  
 絕

一橋梁

平水橋在城西七里下跨一澗遇大雨其水輒平行  
 人病之邑民建砌石橋

八家橋在縣東十里相傳八家環居共建後人誤呼  
 為八角橋